

诸葛亮颂赞诗文选录：铭赞

赞诸葛丞相三国·杨戏

忠武英高，献策江滨；攀吴连蜀，权我世真。受遗阿衡，整武齐文；敷陈德教，理物移风；贤愚竞心，企忘其身。诞静邦内，四裔以绥；屡临敌庭，实耀其威；研精大国，恨于未夷。（《三国志·杨戏传》）

诸葛武侯宅铭晋·李兴

天子命我，于沔之阳。听鼓鼙而永思，庶先哲之遗光。登隆山以远望，轼诸葛之故乡。盖神物应机，大器无方。通人靡滞，大德不常。故谷风发而驺虞啸，云雷升而潜鳞骧。擘解褐于三聘，尼得招而褰裳。管豹变于受命，贡感激以回庄。异徐生之摘宝，释卧龙于深藏。伟刘氏之倾盖，嘉吾子之周行。夫有知己之主，则有竭命之良。固所以三分我汉鼎，跨带我边荒，抗衡我北面，驰骋我魏疆者也。英哉吾子，独含天灵；岂神之祇，岂人之精·何思之深，何德之清·异世通梦，恨不同生。推子八阵，不在孙、吴；木牛之奇，则亦[非]般模；神弩之功，一何微妙；千井齐，又何秘要。昔在颠、天，有名无迹；孰若吾侪，良筹妙画·臧文既没，以言见称；又未若子，言行并征。夷吾反坫，乐毅不终；奚比于尔，明哲守冲。临终受寄，让过许由；负蒞事，民言不流。刑中于郑，教美于鲁；蜀民知耻，河、渭安堵。非皋则伊，宁彼管、晏；岂徒圣宣，慷慨屡叹！昔尔之隐，卜惟此宅；仁智所处，能无规廓·日居月诸，时殒其夕。谁能不歿，贵有遗格。惟子之勋，移风来世；咏歌余典，懦夫将厉。遐哉邈矣，厥规卓矣，凡若吾子，难可究已。畴昔之乖，万里殊途；今我来思，覲尔故墟。汉高归魂于丰、沛，太公五世而反周。想罔两以仿佛，冀影响之有余。魂而有灵，岂其识诸！（《三国志·诸葛亮传》注引《蜀记》。原无标题，《水经注》作《宅铭》，今从之。）

孔明赞晋·袁宏

孔明盘桓，俟时而动。遐想管、乐，远明风流。治国以礼，民无怨声；刑罚不滥，没有余泣。虽古之遗爱，何以加兹。及其临终顾托，受遗作相，刘后授之无疑心，武侯处之无惧色，继体纳之无贰情，百姓信之无异辞。君臣之际，良可咏矣。堂堂孔明，基宇宏邈。器同生民，独禀先觉；标榜风流，远明管、乐；初九龙盘，雅志弥确。百六道丧，干戈迭用；苟非命世，孰扫氛雾·宗子思宁，薄言解控；释褐中林，郁为时栋。（《文选》卷四七《三国名臣赞》）

诸葛忠武侯赞晋·习凿齿

昔管仲夺伯氏骈邑三百，没齿而无怨言，圣人以为难。诸葛亮之使廖立垂泣，李平致死，岂徒无怨言而已哉！夫水至平而邪者取法，镜至明而丑者无怒，水、镜之所以能穷物而无怨者，以其无私也。水、镜无私，犹以免谤，况大人君子怀乐生之心，流矜恕之德，法行于不可不用，刑加乎自犯之罪，爵之而非私，诛之而不怒，天下有不服者乎！诸葛亮于是可谓能用刑矣，自秦汉以来未之有也。（《三国志·李严传》裴松之注引）

蜀丞相诸葛武侯祠堂碑铭（节录）唐·裴度

昔在先主，思启疆宇。扰攘靡依，英雄无辅。爰得武侯，先定蜀土。道德城池，礼义干櫓。煦物如春，化人如神，劳而不怨，用之有伦。柔服蛮落，铺敦渭滨。蹶迹畏威，杂居怀仁。中原旰食，不测不克，以待可胜，允臻至极。天未悔祸，公命不果，汉祚其亡，将星中堕。反旗鸣鼓，犹走司马，死而可作，当小天下。尚父作周，阿衡佐商，兼齐管、晏，总汉萧、张。易代而生，易地而理。遭遇丰约，亦皆然矣。呜呼！奇谋奋发，美志天遏。吁嗟严、立，咸受谪罚。闻之痛之，或泣或绝。甘棠勿剪，骈邑斯夺。由是而言，殊途共辙。本于忠恕，孰不感悦·苟非诚恝，徒云固结。古柏森森，遗庙沉沉。不殄祀，以迄于今。靡不骏奔，若有照临，蜀国之风，蜀人之心。锦江清波，玉垒峻岑，入海际天，如公德音。（《全唐文》卷五三八）

诸葛武侯庙碑铭（节录）唐·尚驰

汉室大坏，扫地无依。人心各动，天命未归。角力争负，有翼者飞。突兀卧龙，吟啸待时。一论世事，超拜军师。鱼水相得，生死一之。仗顺收兵，行权略地。气盖全吴，胸吞大魏。国政成三，人臣莫二。乃建社稷，兴王之器。既得武侯，魏都，敌国未灭，谋臣已殂。大本去矣，不降得乎·荒坟四颓，拱木皆枯。尚余精爽，能禁樵苏。人生异代，仰止山隅。（《唐文粹》卷五五）

诸葛武侯画像赞宋·苏轼

密如神鬼，疾如风雷。进不可当，退不可追。昼不可攻，夜不可袭。多不可敌，少不可欺。前后应会，左右指挥。移五行之性，变四时之令。人也·神也·仙也·吾不知之，真卧龙也！（转录自《诸葛忠武侯集》卷一〇）

诸葛武侯像赞宋·张

惟忠武侯，识其大者。仗义履正，卓然不舍。方卧南阳，若将终身。三顾而起，时哉屈伸。难平者事，不昧者几。大纲既得，万目乃随。我奉天讨，不震不竦。维其一心，而以时动。噫候此心，万世不泯。遗像有严，瞻者起敬。（《四库全书》本《张南轩集》卷三六）

汉丞相诸葛忠武侯赞明·宋濂

龙门子曰：三代而下有合于先王之道者，孔明一人耳。其师以正动，义也；委身事君，忠也；开诚布公，信也；御众以严，智也；其功之不能成，天也。议者则谓其“应变将略非其所长”，又谓其出师“不攻瑕而攻坚，一出师乃与魏氏角，其亡则宜”，又谓其“仁义诈力杂用以取天下，所以失之”，是皆以权谋术数测孔明，而孔明明白正大之心，初未尝知之也。若三者之议，真蛇鼠之见哉！（转录自沈津辑《忠武录》卷四）

诸葛武侯赞明·方孝孺

汉治任法，难乎大臣。惟忠武公，千载一人。综核万变，以义而动。虎跃龙骧，天下震恐。极其智能，乱不足平。天实厄之，大勋无成。成败纷然，处之甚暇。论其所存，伊、吕流亚。古学不传，士气益卑。公心不忘，百世之师。（《正谊堂全书》本《方正学先生集》卷六）

武侯赞清·李柏

在唐、虞，稷、契之友；在商、周，伊、吕之流；在孔门，颜、曾之亚；在李唐、宋、明，伊谁云俦·晦庵谓“天民未粹”，吾不知粹者孰愈于侯！（转录自《勉县忠武祠墓志》卷五）

诸葛武侯像赞清·李光地

王佐不生，于兹千载。邹鲁群圣，靡遇其配。天恐皋、伊，其迹渺茫；欲修厥业，而世永昌。岌岌晚造，鼎运难移；聊使先生，为臣之师。先生不降，萧、管立极。霸图施张，邈矣王泽。先生之道，足俟后圣。紫阳、伊川，莫敢改评。谁追轨躅，谁识容光·我摭史书，以命长康。（《四库全书》本《榕村集》卷三四）

忠武侯像赞清·张鹏翮

儒者之气象，王佐之经纶。去利以怀义，纯忠而得仁。托六尺之孤，洵君子人也；行公平之政，乃一个臣哉！（《忠武志》卷六《赞》）

诸葛武侯像赞清·罗景

致身曰忠，定乱曰武。功著三分，名彰千古。莘野渭滨，易地皆然。彼管仲乐毅，又何足数。（《卧龙岗志》卷首）

武侯像赞清·尹会一

羽扇邪，纶巾邪，形或可貌；澹泊邪，宁静邪，神不可肖。谁其似之·非管非乐。呜呼！汉室有宗臣，肃清宫庙；此间有卧龙，惟闻吟啸。（《畿辅丛书》本《健余先生文集》卷九）